

Vivì per «sia» viafier

Per la mort da Hans Amacker

DA GION NUTEGN STGIER / ANR

■ L'anteriur directur da la Viafier retica Hans Amacker ha bandunà per adina quest mund. Ina giada dapli ha ina malsogna maliziusa fatg fin ad ina vita dad in char uman. La malencurada per l'um da 62 onns è profunda tar la direenziun ed il cussegl d'administrasiun da la Viafier retica sco er tar ses anteriurs collavuratur. Igl è stà in grond schoc il mars 2015 cura che *Stefan Engler*, il president dal cussegl d'administrasiun da la Viafier retica, aveva annunzià ch'el manaschi haja per in temp da renunziar a la lavur da ses directur Hans Amacker. La diagnosa ch'el pateschia da cancer è stada in culp per tuts quels che han ubain pli giadas gi l'onur d'inscuntrar l'um simpatic. Hans Amacker han ins conuschì sco in um cun in carisma particular, ina persuna fitg correcta, in directur stimà e cunzunt in superiur bainvesi dals radund 1400 emploiads da la Viafier retica. A la fin da settember 2015 aveva Hans Amacker gi il giavisch dad ir pli baud en pensiun er per sa revegnir da sia malsogna e per vegnir tar novas forzas. Ussa nov mais pli tard è sia malsogna maligna apparentamain stada pli ferma cun Hans Amacker avair da serrar per adina ses egl e far ses davos viadi, il viadi en la perpetnada.

La Viafier retica – «sia» viafier

Suenter che Hans Amacker, l'um dal chantun Solothurn, aveva surpiglià il favrer 2011 la direenziun da la Viafier retica han ins bunamain mintga di entupà el cuntent e da buna luna. Be cun discurrer da la viafier traglichavan ses egl dal plachair e quellas giadas, ch'el ha gi sco directur da la Viafier retica, l'ocasiun da



Hans Amacker flancà da cusseglier dals chantuns Stefan Engler (a san.) e cusseglier guvernativ Mario Cavigelli, a chaschun da la festa da giubileum 125 onns Viafier retica a Lanquart il zercladur 2014.

FOTO G. N. STGIER

preschentar novs trens han ins adina gi l'impressiun che Hans Amacker saja il pli ventiraivel carstgaun da quest mund. El era cun corp ed olma in vair viaferist ed in directur cun ina passiuun per la Viafier retica sco strusch in auter. Dal 2011 fin il 2015 cura che Hans Amacker è stà directur da quel travagl ha el er adina mess l'uman en il center e nizzegià gugent e savens l'ocasiun da partir intgins plects cun bles da ses collavuratur, els che stavan ad el cunzunt a cor.

Varsaquantas investiziuns

Quels quatter onns sco directur da la «pitschna cotschna» è Hans Amacker er adina stà fitg avert per novs projects. Sut

sia reschia ha la Viafier retica cunzunt adina fatg investiziuns per novs trens, per megliar l'infrastructura e quai adina per il bain dals passagiers. La sanaziun da las staziuns da Tavau, Arosa e San Murezzan portan però er sia noda ed er al giubileum da 125 onns Viafier retica aveva Hans Amacker dà in vestgì festiv. In dals puncts emozionals per el è stada l'emprima badigliada dal nov tunnel d'Alvra il 2014.

Uss è il rintang da vita da Hans Amacker sa serrà per adina ed enavos restan bieras e bellas regurdientschas ad in uman char, simpatic, cordial ed ad in directur che viva er en l'eternitad per la Viafier retica, «sia» viafier!